

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) a u vezi sa Odlukom Predsjedništva Bosne i Hercegovine o veličini, strukturi i lokacijama Oružanih snaga Bosne i Hercegovine, broj 01-011-1110-6/06 od 05.07.2006.godine, izmjenama i dopunama Odluke broj 01-011-69-61/08 od 17.01.2008.godine, broj 01-011-618-6/08 od 18.03.2008.godine, broj 01-011-1828-21/08 od 29.07.2008.godine i broj 01-50-1-1067-10/12 od 18.04.2012.godine, Vijeće ministara Bosne i Hercegovine na 110. sjednici održanoj 23.10.2014.godine donijelo je

## **PRAVILNIK**

### **o izdavanju resursa Stacionarnih komunikacijskih čvorišta**

#### **POGLAVLJE I - OPŠTE ODREDBE**

##### **Član 1.** **(Predmet Pravilnika)**

Ovim Pravilnikom uređuju se pojmovi, načela, prioriteti, uslovi i procedure izdavanja resursa Stacionarnih komunikacijskih čvorišta (u daljem tekstu: SKČ-resursi) iz Odluke Predsjedništva Bosne i Hercegovine o veličini, strukturi i lokacijama Oružanih snaga Bosne i Hercegovine broj: 01-011-1110-6/06 od 05. jula 2006.godine, izmjene i dopune Odluke broj: 01-011-69-61/08 od 17. januara 2008.godine, broj: 01-011-618-6/08 od 18. marta 2008.godine, broj: 01-011-1828-21/08 od 29. jula 2008.godine i broj: 01-50-1-1067-10/12 od 18. aprila 2012.godine (u daljem tekstu Odluka Predsjedništva Bosne i Hercegovine) za druge korisnike, te način pristupa Stacionarnim komunikacijskim čvorištima.

##### **Član 2.** **(Definicije)**

Izrazi korišteni u ovom Pravilniku imaju sljedeće značenje:

- a) *Stacionarno komunikacijsko čvorište* je objekat koji je Odlukom Predsjedništva Bosne i Hercegovine o veličini, strukturi i lokacijama Oružanih snaga Bosne i Hercegovine utvrđen kao objekat Oružanih snaga Bosne i Hercegovine, i koji je prvenstveno namijenjen i uređen za instaliranje radio i radiorelejne opreme i sistema.
- b) *SKČ-resurs* predstavlja mogućnost postavljanja komunikacijske i informatičke opreme na Stacionarnom komunikacijskom čvorištu. Ova mogućnost je ograničena fizički – prostornim kapacitetom u objektu i na antenskom tornju i elektronski – elektromagnetnom kompatibilnošću.
- c) *Budžetski korisnici* su institucije i tijela Bosne i Hercegovine, entiteta, kantona, Brčko Distrikta, gradova i općina koji se finansiraju iz budžeta.

- d) *Drugi korisnici* su organi i tijela koji se ne finansiraju iz budžeta te druga pravna lica.
- e) *Elektromagnetna kompatibilnost* je mjera mogućnosti da dva ili više uređaja, koji koriste elektromagnetni spektar, mogu nesmetano funkcionisati na određenom fizičkom prostoru.

**Član 3.**  
**(Načela izdavanja SKČ-resursa)**

Izdavanje SKČ-resursa zasniva se na načelima:

- a) zakonitosti,
- b) efikasnosti,
- c) ekonomičnosti,
- d) nekonkurentnosti (nepostojanja tržišne konkurencije)
- e) fiksnih cijena.

**POGLAVLJE II - PRIORITETI I USLOVI IZDAVANJA SKČ-RESURSA**

**Član 4.**  
**(Prioriteti korištenja, korisnici i ograničenja pri izdavanju SKČ-resursa)**

- (1) SKČ-resursi se prvenstveno koriste za potrebe Ministarstva odbrane Bosne i Hercegovine (u daljem tekstu: Ministarstvo) i Oružanih snaga Bosne i Hercegovine (u daljem tekstu: Oružane snage).
- (2) SKČ-resursi se daju na korištenje Budžetskim korisnicima bez naknade ali uz snošenje troškova korištenja i održavanja SKČ-resursa.
- (3) Drugim korisnicima SKČ-resursi se izdaju u zakup.

**Član 5.**  
**(Opšti uslovi izdavanja SKČ-resursa)**

- (1) Ministarstvo daje na korištenje odnosno daje u zakup SKČ-resurse Budžetskim korisnicima odnosno Drugim korisnicima samo ako to ne ugrožava sisteme Ministarstva i Oružanih snaga.
- (2) Budžetski korisnici odnosno Drugi korisnici koriste SKČ-resurse u skladu sa ugovorom i ne mogu ih dati u podzakup ili dati bez naknade na korištenje trećim licima.
- (3) Da bi se SKČ-resurs dao na korištenje Budžetskom korisniku odnosno izdao u zakup Drugom korisniku, isti mora pribaviti sve potrebne dozvole za rad opreme i sistema koji se instaliraju, najkasnije do momenta instaliranja opreme i sistema na Stacionarno komunikacijsko čvorište.

**Član 6.**  
**(Posebni uslovi izdavanja SKČ-resursa)**

- (1) Između Ministarstva i Budžetskog korisnika odnosno Drugog korisnika, zaključuje se ugovor o korištenju odnosno zakupu SKČ-resursa u kojem se regulišu i utvrđuju prava i obaveze ugovornih strana.
- (2) Na osnovu ovog Pravilnika Ministarstvo će donijeti poseban dokument (Instrukciju) kojim će propisati bitne elemente ugovora i precizirati proces pripreme i realizacije ugovora.
- (3) Budžetski korisnik odnosno Drugi korisnik je obavezan da, u skladu sa Zakonom i važećim opštim uslovima za isporuku električne energije, za svoju opremu i sisteme obezbijedi nezavisan izvor napajanja električnom energijom.

**Član 7.**  
**(Naknada za zakup)**

- (1) Budžetski korisnik ne plaća naknadu za korištenje SKČ-resursa ali snosi troškove korištenja i održavanja a što se precizira u ugovoru o korištenju.
- (2) Drugi korisnik plaća Ministarstvu naknadu za zakup SKČ-resursa na mjesečoj osnovi.
- (3) Naknada za zakup SKČ-resursa se određuje u skladu sa važećim Cjenovnikom i precizira se u ugovoru.
- (4) Naknada za zakup SKČ-resursa uplaćuje se na Jedinostveni račun trezora BiH u skladu sa odgovarajućom instrukcijom Ministarstva finansija i trezora.

**POGLAVLJE III - PROCEDURE IZDAVANJA SKČ-RESURSA**

**Član 8.**  
**(Podnošenje zahtjeva)**

SKČ-resursi se Bužetskom korisniku odnosno Drugom korisniku daju na korištenje odnosno izdaju u zakup na osnovu pisanog zahtjeva koji se podnosi Ministarstvu na pripremljenom obrascu (*Prilog*).

**Član 9.**  
**(Nadležnosti Ministarstva)**

- (1) Ministarstvo za svaki zahtjev utvrđuje postojanje opštih uslova za davanje na korištenje odnosno izdavanje u zakup SKČ-resursa.
- (2) Ukoliko postoje opšti uslovi za davanje na korištenje odnosno izdavanje pod zakup SKČ-resursa, Ministarstvo sa podnosiocem zahtjeva dogovara sve tehničke

detalje davanja na korištenje odnosno izdavanja pod zakup SKČ-resursa, te priprema ugovor o korištenju odnosno zakupu SKČ-resursa i u skladu sa propisima iz ove oblasti upućuje isti u proceduru ocjene pravne valjanosti.

(3) Ugovor o korištenju odnosno zakupu SKČ-resursa, nakon ocjene pravne valjanosti, potpisuje Ministar odbrane i dostavlja Budžetskom korisniku odnosno Drugom korisniku na potpisivanje.

#### **Član 10. (Cijena zakupa SKČ-resursa)**

(1) Cijena zakupa SKČ-resursa za Drugog korisnika određuje se Odlukom o utvrđivanju cjenovnika izdavanja u zakup SKČ-resursa za Druge korisnike.

(2) Odluku o utvrđivanju cjenovnika izdavanja u zakup SKČ-resursa za Druge korisnike donosi Vijeće ministara Bosne i Hercegovine na prijedlog Ministarstva.

### **POGLAVLJE IV - PROCEDURE PRISTUPANJA STACIONARNIM KOMUNIKACIJSKIM ČVORIŠTIMA**

#### **Član 11. (Odobrenje i omogućavanje pristupa Stacionarnim komunikacijskim čvorištima)**

(1) Budžetski korisnik odnosno Drugi korisnik, nakon potpisivanja ugovora o korištenju odnosno zakupu SKČ-resursa, dostavlja Ministarstvu spisak lica koja će vršiti održavanje opreme i sistema instaliranih na Stacionarnim komunikacijskim čvorištima.

(2) Procedure ulaska lica iz stava (1) ovog člana na SKČ, Ministarstvo će regulisati u skladu sa važećim propisima.

(3) Procedura po kojoj Budžetski korisnik odnosno Drugi korisnik upućuje zahtjeve za pristup lica Stacionarnim komunikacijskim čvorištima radi održavanja opreme i sistema sastavni je dio ugovora o korištenju odnosno zakupu.

### **POGLAVLJE V - PRELAZNE I ZAVRŠNE ODREDBE**

#### **Član 12. (Prelazna odredba)**

U roku od 6 mjeseci, od dana stupanja na snagu ovog Pravilnika, status i prava postojećih korisnika SKČ-resursa regulisati će se u skladu sa odredbama ovog Pravilnika.

**Član 13.**  
**(Stupanje na snagu)**

Pravilnik stupa na snagu osmog dana od dana objavljivanja u “Službenom glasniku BiH”.

VM broj 180 /14  
23.10.2014. godine  
Sarajevo

Predsjedavajući  
Vijeća ministara BiH  
Vjekoslav Bevanda S.R.

**ZAHTJEV****ZA KORIŠTENJE ILI ZAKUP STACIONARNIH KOMUNIKACIJSKIH ČVORIŠTA**

<b>PODNOŠIOCI ZAHTJEVA</b>	<b>Naziv podnosioca</b>		
	<b>Adresa</b>		
	<b>Kontakt osoba</b>		
	<b>Kratak opis djelatnosti podnosioca</b>		
<b>ZAHTJEV ZA INSTALIRANJE OPREME</b>	<b>Lokacija</b>		
	<b>Period korištenja</b>		
	<b>Kratak opis sistema u kojem će funkcionisati oprema</b>		
	<b>Vrsta uređaja</b>		
	<b>Dimenzije uređaja</b>		
	<b>Izlazna snaga uređaja</b>		
	<b>Potrošnja električne energije uređaja</b>		
	<b>Vrsta antene</b>		
	<b>Dimenzije antene:</b>		
	<b>Snaga elektromagnetnog zračenja</b>		
	<b>Dijagram zračenja antene i dobitak antene</b>		
	<b>Mogućnost osiguranja vlastitog izvora napajanja električnom energijom</b>		
	<b>Da li postoje potrebna odobrenja od regulatorne agencije za komunikacije</b>		
	U _____, dana _____ . godine		<b>Potpis podnosioca zahtjeva</b> _____